

Persembahan budaya UMP seri acara Sabtu ini

Metro (setempat) KAJANG 24/1/2010 (MS 12 A)



KUANTAN: Pembaca setia Harian Metro (HM) bakal disajikan persembahan kebudayaan pelajar Universiti Malaysia Pahang (UMP) menerusi kumpulan tarian Kencana Pawana yang diuruskan Unit Kebudayaan & Seni Kreatif UMP sempena acara kemuncak Gempak Santai HM @ Taman Air Bukit Gambang (TABG), di sini, Sabtu ini.

Lebih menarik, UMP turut membawakan sekumpulan 12 pelajar Orang Asli dari Paloh Hinai, Pekan, yang akan membuat persembahan istimewa dinamakan Tarian Pelanduk yang lazimnya dipersembahkan untuk majlis tertentu.

Difahamkan, tarian ini dicipta berdasarkan kepada cara bagaimana masyarakat pribumi itu memburu pelanduk di dalam hutan sejak dulu lagi.

Pada masa dulu mereka pergi memburu dengan menggunakan parang dan bagi memanggil pelanduk mereka menggunakan daun terap sebagai umpan.

Ia turut menceritakan bagaimana pemburu pergi berburu di hutan dan mendapat habuan mengikut nasib ma-

sing-masing.

Menurut Pegawai Kebudayaan dan Seni Kreatif UMP, Mohd Zaki Ahmad, kumpulan Kencana Pawana yang ditubuhkan pada 2005 pada awalnya dianggotai beberapa pelajar saja sehingga tidak pernah cukup untuk membuat persembahan, apatah lagi memasuki pertandingan.

“Bagi karnival Gempak Santai HM, kami akan menampilkan kelainan dalam persembahan kebudayaan khas untuk pembaca akhbar ini, selain memperkenalkan persembahan masyarakat Orang Asli yang jarang dipertontonkan,” katanya.

Katanya, Kencana Pawana dijadikan medium kepada anak seni UMP untuk berkecimpung dan bergiat dalam bidang teater baik dari segi lakonan, pengarahannya mahupun kru produksi.

Sementara itu, bagi pembaca ingin menginap sebelum atau sesudah acara kemuncak Gempak Santai HM boleh membuat tempahan bilik di Caribbean Bay Suites (CBS) yang menawarkan 578 bilik merangkumi 140 unit Studio Suite, 420 unit Family Suite dan 18 Deluxe Suite pada harga berpatutan.

Untuk pertanyaan dan tempahan bilik, mereka yang berminat boleh menghubungi talian 09-5488000 atau hantar faksimili ke nombor 09-5486888. Malah, maklumat mengenai CBS juga boleh dilayari di laman web www.bgrc.com.my serta laman web sosial Facebook dan Twitter.